



Орган Лемковского Союза

**Пренумерата в краю:**  
30 грошей місячно,  
80 „ квартално,  
1.50 „ полрочно,  
3 зл. рочно.  
В Амерыці: 1 дол. рочно.  
В Чехословакии:  
2 кор. місячно, 10 кор. полрочно,  
20 кор. рочно.  
Ціны оголошень:  
Ціла сторона 120 зл., 1/2 сто-  
роны 60 зл., 1/4 стороны 35 зл.,  
1/8 стор. 20 зл., 1/16 стор. 10 зл.;  
оголошення малы за 1 мм. 20 гр.,  
в тексті 30 гр., перед текстом  
40 гр. При місячном и долшом  
оголошеню значна знижка.  
Контото чекове Нр. 404.155.

Выходит в каждый четверг.

Редакция и администрация в Крыниці. — Адрес „Лемко“ Крыница.

УЖ ПОЯВИЛ СЯ БОГАТО ИЛЮСТРОВАНЫЙ

КАЛЕНДАР „ЛЕМКА“ НА 1938. РОК

Ціна 1 екземпляра календара разом с великим календарем стінним выносит 50 грошей и кошты пересылкы. При замовленях 10 штук кошты пересылкы поносит администрация ЛЕМКА. Для кольпортеров великий опуст. Замавляти треба в администрации ЛЕМКА, Крыница 2.

Потреба фахового просвіщеня для селян.

Краи о високом уробні просвіщеня як нпр. Швайцария, Німеччина, Дания, Голяндия и инши, отличают ся внутренним порядком и ладом, а также добробытом населеня. Лем свідомма своих обовязков и цілей одыница може ити певно через жите, суміє радити собі во многих, трудных нераз обстоятельствах и обезпечити удержане собі и родині. В том послідном случаю помагат особенно наука фахова, котра учит, в який спосіб треба выконати роботу с области ріжных занятъ и, як то вварят, даю челоуікои фах до руки.

В звязи с тым в Польщі и в других краях повстає чим раз больше фаховых школ ріжных тыпов и спеціальностей, як: механичных, ковальских, столярских, хемичных, кустецких, кравецких, домашнего господарства и т. д.

Без добре поставленого фахового просвіщеня не мог бы в теперешных часах розвивати промысл, ремесл и торговля. Фабрыкы жадают также от кандыдатов на посады свідочств окончена школы фаховой.

Лем в сельском господарстві мало звертат ся увагы на фаховы знаня. Сут в краю нашом ріжны школы рольничы, садовничы, лісовы, домашнего господарства и т. д., але до тых школ ходит лем малый процент сельского населеня. Звычайно науку сельского господарства достає сын от своего отца на родинном фалатку поля. Наука сельского господарства путем практикованя на отцовском господарстві не може в теперешных часах выстарчити. Тепер ест уж за сильный розрост знаня и техники рольничой, за великы сут жаданя поодынокых отраслей сельского господарства, штобы маленький отцовский варстат мог дати молодежи выстарчаюче фахове образованя. Днеска хоц бы и як образованный работник мусит все

дополняти свои знаня, если хоче ити с поступом техники фаховой.

Школьна и позашкольна наука рольнича (всякого рода господарчи курсы) обнимат всі отрасли сельского господарства. Передовсем учит она основ организоваия и веденя господарства, призадуме ся над тым, што треба робити, штобы поднести рентовность, а также, як обчисляти и спраяджати чи новы пробы сут рациональны и чи ся оплачают.

Друга ціль рольничого просвіщеня — то наука рационального вышолняия ріжных работ в сельском господарстві. Селянин мусит уміти управяти и навозити свою ниву, доберати зерно, мусит уміти бороти ся со шккодниками и хворотами рослин в поли и загороді — мусит вміти ховати домашны звирята, куровати их в разі хвороты и много много инших работ, потребных в сельском господарстві.

Наконец селянин мусит знати также, які вымогы ставят купец продуктам, продаваным с господарства и мусит уміти, як приготувити господарскы продукты до продажи и як их продати.

Таки відомости и знаня мусит мати каждый образованный селянин. Кус отмішны мусит добыти огородник, садовник, лісник, рыбак, молочар и т. д. Все тоты знаня дают школы рольничы и позашкольны курсы господарчи.

Але жите селянина вышолняит не сама работа на поли и обыстю. Каждый селянин належит до сельской общественности и має свою родину. Мусит он отже уміти жити с родином

и с окруженем, мусит быти добрым сыном, мужем и отцом, а также пожиточным членом своєї громады. Ест тото не меньше важне, як посеідане фахового знаня, особенно, же обі тоты справы лучат ся сильно с собом, бо селянини може лем втотчас добре стояти, коли всі селяне будут дійствовати разом.

Сельске жите не терпит егоизма и жадаот населеня сталого лучного діланя для добра одыниц и загального. Поодынокый селянин ест за слабый, штобы мог успішно противділати неприязным чинникам, с котрыма встрічат ся в штоденном житю и прото мусит он памятати, же лем в лучном діланю ест его сила.

Селянин часто знає о том, але не уміє ся до того взяти. Рольниче просвіщенє показує ему дороги.

В рольничой школі молодеж жие разом, учит ся и ховат в громаді и разом переживат добры и злы часы. Уж тото само показує молодежи наглядно, же неодну трудность, неодну перешкоду, котрой в одыночку не дало бы ся поконати, всі разом, злученыма силами легко переодоліт. Крім того в школі организує ся колежанскы товариства, школьны кооперативы, где молодеж познакомлят ся с діятельностью рольничих организации.

Привыкати за молоду до общественной работы, сельска молодеж через принимане чинной участи в организационной работі села, т. е. через належане до читалень им. М. Качковского и місцевых кооперативов. Таким спосібом молодеж позбуде ся пустого говореня и привыкне до реальной работы, яка непосредно впливат на поднесенє ся сельских господарств.

С того видиме, же селянин потребує конче фахового просвіщеня, без котрого не може быти пожиточным ани для родины, ани для своего села и державы.

Памятйме

о зимушной помочи для безработных!

—оо—

## Гминны стыпендии и фахове образованє.

Зарядженем премера ген. Славои Складковског маюг все гминны при укладаню бюджетов поместити также позыцию на стыпендии для учачой ся молодежи. Гмина дае такую стыпендию одному або двум ученикам, походячим с терену даной гмины, котры своим поведением и способностями заслужуют на тог найбільше.

Тепер наближат ся час укладаня бюджетов на 1938/39 рок и, як чуеме, праві на тоту добру цілю через тог помагуют бідной сельской молодежи користати с великого добра, яким ест наука.

Однак найбільше наших учачих ся сынов иде до гимназии. Нич в том дивного, бо люде привикли ст давна до того, же як сына даюг до школы то мае быти вомоством, а як ні, то по крайной мірі учителем або урядником. Тог однак мало користи приносило селу, бо сын — урядник переносил ся до міста и звичайно зрывал всяку звязь с селом. Для добра села потреба, штобы тоты сельскы сыны, котры кончат школы, вертали с поворотом до села и своим знанем, своим науком помагали своим братьям и сестрам. Ест тог потребне особенно тепер, коли жите на селі ест тяжше. Тепер лем

при умыгам выкористаню все возможных жерел доходу даст ся вязати концы с концами и господар на селі повинен не лем знати ся веденю самого господарства, але в першой мірі мусят он быти добрым организатором и кушцом, уміючим добре калькульовати.

Таки знаня даюг фаховы рольничы школы и до тых передовсем повинно ся посылати дітей, котрым гмины даюг стыпендии и запомогы. Если хлоп робит выдаткы на науку, то нехай тот хлопскый грош принесе користь хлопцу.

Не хоче такой хлопец-стыпендыста ити до школ сельского господарства — не хоче выучити ся на агронома-инструктора, отдати его на науку до инних школ фаховых, (столярскых, ковальскых, кооперативных, молочарскых, садовничих и т. д.), але все лем таких, по окончению котрых мог бы осісти в родном селі и ложити свой труд для добра своего и села.

Вотчас грош, даный на стыпендии, не пропаде для села, а наоборот принесе селу великы користи. Наши села поднесут ся экономично, што потягне за сабам поднесенє ся также духовой культуры села.

—000—

## Собранє членов Лемко-Союза в Горлицах.

На жаданє сельскых делегатов Лемко-Союза скликано на день 18. грудня т. р. собранє членов до Борлиц. На собраня тог прибыли делегаты праві всех сел повіта горлицкого и многы делегаты сусідных повітов.

Собранє мало характер поважный. Делегаты представили теперешный стан научаня материнского языка в школах своих сел и домагали ся предприняти крокы в ціліи привернення давного стану річей.

По выслуханю делегатов, собранє рішило

одноголосно выслати прошенє до центральных властей (школьных и администрацийных) и 2) делегацию, зложену с выбранных делегатов, котра именем Лемко-Союза и населения западной части Лемковщины представит устно школьным и администрацийным властям и предложит прошения о зміну теперешного стану річи и приверненє науки руского языка в таких рамках, як то мало місце перед ваканциями р. 1937.

—000—

## Помагайте учачой ся молодежи.

Уж нераз писали мы о помочи для учачой ся молодежи, містячой ся в Руской Бурсі в Борлицах. Знає уж каждый, же бурса потребує помочи. Але чи сполнили все свой обовязк в виду тых маленьких діточок? Чи все села перевели уж збор жертв на бурсу?

Если ні, то зробме тог при наближаючих ся святах Рождества Христового! Нехай никто не жалует „коляды“ для малых школяриков, котры по окончению науки отслужат уцтиво дагу им „коляду“ и причинят ся до экономичного и культурного поднесеня нашего села!

## Положенє на Далеком Выході.

Опасне положенє на Далеком Выході спричинил затисненя звязи меже Англиом, Америком и Франциом.

На переведеных конференциях рішено вскріпити военну флоту на Спокойном океані, а также увеличити число военных самолетов. Англия выслала уж на выход 3 величезны военные кораблі. Америка рішила сконцентровати свою флоту коло островов Гавайскых. Тог все мае на разі на ціл предостережи Японию перед ей агрессивными наміренями в Кытаю.

Особенно Америка по затопленю ей канонеркы через японскы самолеты, ставлят справу рішительно. Неприязнь Америки до Японии ест так сильна, же в Америкі палят японскы товары. Правда, амбасадор японскый в Вашингтоні перепросил американскый народ через радио, але помимо того американе Японии не вірят, бо в Японии ест так, же одны перепрашают а другы нападают.

## Дальша „чистка“ в Совітах.

Газеты доносят о дальших розстрілах в Совітах.

На основі выроку военной коллегии верховного суда с дня 16 т. м. были розстріляны за зраду головну, систематичне шпйонство в користь одной с сусідных держав и за терорыстичну діяльність:

**Енукидзе**, бывший секретар Центр. Испол. Комит. СССР.

Барон Штайгер неофициальный член протоколу дыпломатического.

Карахан, б. посол в Варшаві и б. амбасадор в Кытаю, в последнем часі амбасадор в Турции.

Орахеляшвили, старый большевик, лікар, бывший председатель Ц. Ком. партии грузинской.

Шеболдаев, секретар окружн. комит. парт.

Ларин, старый большевик и литерат.

Цукерман, бывший дыректор департамен-

ту выходного при народном комисарияті справ заграничных.

Видно Сталин хоче позбыти ся всех давных своих компанов.

## Война в Испании.

По долном часі перервы, генерал Франко приступил до новой офенсывы. Войска его однак были заскочены сильном контр офенсывом правительственных войск, котры ударили на місто Теруель. Атака войск правительственных была барз добре организована. Они окружили висунены позиции войск ген. Франко и под ослоном ночи имарили великы силы с чолгами, хотячи выкористати момент заскочени. Місто ест окружене с трьох стран войсками правительственными так, же повстанчы войска маюг звязь с містом лем вздолж ріки Буадаля-вьяр.

Бой идуг на безпосередном передполи міста. Діланя военны утруднят однак сильный сніг с дождем.

## Лучи смерти.

Давно уж пише ся о вынаході „лучей смерти“. Маюг то быти лучи (прамена), отличаючи ся свойством убиваня всего, што находит ся на их дорозі. До тепер однак все відомости о „лучах смерти“ оказали ся выдумком.

В последных часах доносят англицкы газеты о вынаході проф. Антони, котрому удало ся вынайти наиправду такы смертоносны лучи. Газеты описуют широко тог вынаход проф. Антони, котрый основует ся на том, што каждый газ и каждое хемичне тіло мае власну фалью, и што такую фалью можна передавати вьоздухом.

При помочи радио-фалью можна вышущати фалі хемичных тіл и газов в означеном напрямі и на означене отдаленє, регулиючи их так, як выстріл арматы.

Апарат проф. Антони може пересылати вьоздухом отрую, котра потрафит убити каждое живе существо в районі дієвствия фалью. Сам апарат ест невеликий и его можна перевезти на самолеті, або на тягарном самоході. Апарат тот може задержати и знищити каждый перелітующий аероплян. Фалі того аппарата не дадут ся ничим остановити. Они переходят через мурь, бетон, сталь, дерево, шкло и т. д.

Апарат тот выпробовано в тогорочных літних маневрах под Лондоном. Проф. Антони в присутности знатоков и представителей войска и правительства находил ся со своим аппаратом в отдаленю 5 км. от площади, с котрой мало поднести ся в вьоздух шесть бомбовых самолетов. Резервоары самолетов были наполнены чистом бензыном, котрой чистоту ствердила специальна комиссия.

Колы бомбовозы мали подняти ся в вьоздух, проф. Антони пустил в ход свой апарат, котрым передал фалі двох газов (кислорода и водорода), якы змішаны разом даюг воду. Бомбовозы под вьпльвом тых фалью не потрафили оторвати ся от землі.

Колы оглянули пак резервоары, переконали ся, же в бензыні ест вода и прото моторы не могли быти пущены в рух.

Над „лучами смерти“ трудил ся проф. Антони 10 літ. „Лучи смерти“ могуг оказати ся страшным оружіем в случает войны.

**В Редакции „Лемка“ в Крыниці можна достати ріжны книжочки религиозного содержания.**

## Англия вскріплят війсковы сили в Египті.

Англия рішила выслати в найближшом часі до Египта оділы противлетничой артилерии. Египет, маючий свою самостоятельность державну, згодил ся на того, хоц передом противил ся тому. Зрозуміла річ, же Италия ест недоволена и заскочена вскріпленем наглицких войск в Египті, бо тепер голос Англии в справах середземноморських буде напевно важнійший.

Газеты подають также відомости, котрым не хоче ся вірити, а именно, же жида и арабы в Палестыні погодили ся. Доносить о том газета арабска. Договор тот предвиджат продолжене теперешного положеня с тым, же в Палестыні має мешкати 65% арабов и 35% жидов.

Если ест така згода, то хыбаль лем меже уміркваныма групами обох стран, бо трудно допустити, штобы рух арабский, котрый уролял уж тилько кырви, думал тепер о згоді.

## Пчолы без жала.

В Ричмонд в Амерыці выголосил на конгресі природников интересный реферат американский биолог Лойд Ватсон. Он представил собранным нову породу пчол, котры отличают ся тым, што не мають жала. Пчолы такы мають значно долше рыльце, котрым могут проникати в узку чашочки квітя, где не достають ся звывчайны пчолы.

Тот гатунок пчол одержал Ватсон путем парованя ріжных пород пчол, котрых черв поддывал под дйствие лучей рентгена.

Пчолы без жала не могут жалити, што причинило бы ся сильно до поширеня пасічництва.

## „Долина смерти“.

От віков знана ест в Амерыці одна долина, положена в Кольорадо, котру называють „долином смерти“. Назва тота походить от того, же жаден звір не може там долго жити. Коровы, коні и други домашны звірята, гынут ту в коротком часі.

Уж от давна учены старали ся розелідити причину того явления, всякы однак експерименты не довели до позытивных результатов.

Перед 4-рома роками поселило ся в „долині смерти“ двох американских агрономов, котры рішили за всяку ціну выкрыти тайну. Они звернули увагу на род грунту и по переведеню ляботорийной анализы ствердили, же земля ест там пересычена одним гатунком соли труючей, котра достає ся также до рослин. Звірята, пасучи ся, труют ся поволи и гынут. Соль тота спричинят розмягченє костей.

## ХЛІБА И МОРФИНЫ! — КРИЧАТ ПРОКАЗНЫ.

Дунай впадат до Чорного Моря трьома корытами и творит при устю вилы. На одном с так утвореных островов, находит ся колония людей зараженных страшном хворотом, проказом, котра червит ціле тіло так, же повстає струи на струі і тіло фалатками гниє и отпадат. Проказны терпят страшны болі и одыноным средством, змягчаючим болі ест морфина.

Жиют они в селі, котре называт ся Тилихести. Село тото має 100 хаток, с огородами и

150 гектаров урожайной-землі. Жие в том селі 130 мужчин, 105 женщин и 26 малых дітей. Все хворы на тоту страшну хвороту.

Несчастливым тым людям было бы ненай-планьше, як бы не того, што каждого року Дунай выливат и заливат их поля и втотчас до их хат заглядат голод и нужда.

Притиснены голодом и недостатком морфины, несчастны тоты есідают до лодок и ідут до найближших людских осель.

Населенє с сусідных сел боит ся их паично. Віжит втотчас до костела, бе в дзвоны и отдає ся в опеку Богу.

Так само было и тепер. Костел в Тульцеи не мог помістити перестрашенных людей, утікаючих перед зараженыма.

Одділ полиции вышол напротив громады проказных. Ишли праві самы мужчины. Одіты в баранковы шапки, бородаты, выглядали страшно.

— Чого хочете? — крикнул до них комендант полиции. Оден с проказных, сліпый Тома Пигиль, котрый ишол на переді, крикнул:

— Хліба хочеме и морфины! Хочеме жити.

— Вертайте до Тилихести, пришлеме вам там поживу.

— Хліба! кричали хором проказны. И ишли вперед, готовы шмарити ся на людей и кусати.

Втотчас полиция выстрілила на пострах. Але и того не помогло. Найгрознійший был Пигиль. Коли был уж близко, пал знова стріл и Пигиль упал раненый на землю. Решта почала пофати, сіла на лодкы и утекла.

Правительство послало проказным хліб, рыбы, напрыку и инши провианты, а также морфину.

Серед тых несчастных людей, котры лишили родины, мужей, жены, діти и приятелей, жие лем двое здоровых людей. Ест то администратор Юрий Конаке со своей женом. Тот пара згодила ся добровольно жити серед тых несчастных. На разі сут ище здоровы, але кто знає, чи незадолго не появит ся на их тілах маленьке пятно, знамя той страшной хвороты.

— Тоты несчастны — сказала жена администратора — барже як хліба, потребуют морфины, штобы облегчити свои болі. Голод морфины попыхат их до бунту и втотчас готови они ити на смерть.

## ПРАКТИЧНЫ РАДЫ ДЛЯ ГАЗДЫНЬ ПЕРЕД СВЯТАМИ.

**Перожкы с грибами.** Тісто с самым яйцем без воды роскатулькати тонько и надівати звареныма и дробно покраяныма білячками. Грибкы варит ся и крає дробно с усмаженом на маслі, або кунеролоу цыбульом и смаком с грибов. Такы перожкы дає ся до бурачаного борщу.

**Смажены селедцы.** Селедцы вымочити через 24 годин в воді, або ище лучше в молоці. По вымоченю ополокати, очистити со скоры и старанно осушити. Посыпати муком, класти на рынку на румяне маслє (або олій) и обсмажити с обох стран. До них подавати варены, або печены бандуры.

**Голубцы.** На 24 голубцы взяти 24 листкы звареной свіжой, або заквашеной капусты. С листя вырізати грубны жилкы. Зварити 40 дкг. рыжу, або гречаной каши. 4 цыбулі покраяти и пересмажити с маслом.

До выстуженого рыжу, або каши вбити 2 цілы яйца, додати цыбулю, вымішати старанно и додати до смаку соли и попру. Всео того вымішати и завивати до капустяного листя.

## Высылал до Амерыкы.

В селі Карликов был парохом и деканом э. Юрко Минчинский, великий поклонник Украины, а ище больший любитель долларов. За вінчанє брал по 10 и 15 долларов и так ся ему доллары сподобали, же ани не позерал на злоты. В р. 1929 перенес ся он до села Ванев коло Белза, але и там не забыл, же в Карликові и в Полонной находят ся ище люди, котры мають доллары.

Доллары тоты не дают ему спокою. Через доллары тратит смак до ідла и сон втіче от него. Где лем посмотрит, привиджують ся ему доллары. Аж читаючи историю великого украинского народу натрафил на світлу карту житя Василя Вышиваного.

— Нашол я — крикнул обрадованный о. Минчинский — нашол я способ! Доллары будут мои.

— Правда, Вышиванный поначил штоси в Парыжі, але то всео одно. И доллары будут мои, и славным я стану.

Іхат о. Минчинский до Карликова и повідат людям, же може вывезти до Амерыкы без документов каждого, кто лем заплатит 300 долларов и то 180 долларов дораз, а решту при выїзді.

Способ оказал ся добрый, бо сейчас нашли ся легковірны, котры повірили „вітцю деканови“ и поплатили задаткы. С Полонной вплатили на тоту ціль до его рук: Андрей Куринка 180 \$, Юрко Финчак — 180 \$, а с Карликова — Матей Гулич 240 \$, Дмитро Пужик 180 \$, и Стефан Остафий 180 \$, разом 760 \$.

О. Минчинский выїхал с грошами и мал дати знати о терміні выїзку. Тымчасом оказало ся погодивше, же мал он в Тарнові „честну компанію“, котрой власти выточили слідство.

По законченю того слідства о. Минчинский вернул Гуличови 40 \$, а другим по 50 \$, так же сума 520 \$, остав до того часу при руках о. Минчинского.

В той справі звертал ся я до епископа перемыского и дивує мене сильно, же епископ не лем не дал жадной помочи покривдженым, але ани на лист не отвіттил. Чиж-бы уважал, же таке поведене священника ест правильное, а може ддятого зробил его деканом?!

Иван Кутын.

Полонна, дня 13. грудня 1937.

## Што чути в світі і в краю

**В Америці сніг і морози.** В цілої Півночної Америці, особливо в Пенсильванії і коло Нью-Йорка шаліють сніжні задувки і морози. В снігах о 1½ метрової висоті застрягло около 8 тисяч самоходів, оставлених через властителей на произвол судьбы. Парудесят особових і тягарових поїздів жде на помоч в сніжних заспах.

До гдеяких міст по пару днів не доведено провіантов через сніжні заспа. Кто не має в коморі, тот мусит голодовати. Закрито школы, уряды і фабрыкы. Парудесятеро люда замерзло.

Так ест в Полн. Америці. А на полудни, в півночної Калифорнії, краю вічного літа, несе знищене друга біда — вода. Долготревалы дожджи спрочинили заляне водом великих пространств. Много домов понесла вода розляных рік, а меже нима вода забрала оден шпиталь, при чом згынуло двоє дітей.

**Величезна катастрофа залізнична в Англії.** Коло Глясгова в Англії мала місце страшна залізнична катастрофа, найбільша от 20 літ. С неусталеної причини вылетіл с шин і розбіл ся скорый поїзд. В катастрофі забиле ся 34 людеі, а 92 ест тяжко ранених. Акция ратункова была трудна, бо в том часі мело снігом і был сильны мороз. Лікары пре-дерали ся через заспа снігу. Катастрофа мала місце в ночи, што ділало катастрофу ище страшнійшом.

До полночи выдобыто с под розбитых вагонов 24 трушы і парудесят ранених. В часі ратунковой акции запалили ся от походні вагоны, в котрых находило ся 8 трупов і парудесятерох ранених, взываючих помочи. С трудом загашено огонь. Так великой катастрофы не занотовано в Англії от часу світової войны.

**Злива в Греції.** Три провинции грецкы были тереном великой зливы, котра формально затопила цілы пространства. Утопило ся много людеі. Подобна буря шаліла над побережем Моря Егейского і на морі. В рузгуканых волнах воды затопили ся два великы кораблі с парудесятерома членами обслугы. Така сама судьба встрітила цару рыбацкых лодок, котры не здужали перед бурьом приплынути до берегов.

**До Березы высылат ся тепер криминали-стов.** Министерство Справ Внутр. звернуло в послідном часі увагу на факт, же относительно невелика група фаховых преступников пополнят велике число злочинов, крадежей, убийств і нападів. Сут они небезпечны для населеня, а кромі того дают они барз дуже роботы полициї, котра не все потрафит предохранити населене перед опасностью.

Выкликує тот серед населеня переконанне о недостаточной безопасности в державі.

Рішено с тым покончити і высылати тых всіх преступников до Картуз. Березы. В послідных часах выслано там стопарудесятох спекулянтов і шмуглеров. Гдеякы с них маюти широку криминальну минувшость. Сут там і такы, котры передом просідили по 20 літ в криминалі. Оден с них был уж 48 раз каранный, а оден ест властителем 17-ох каменіц і 2-ох сел.

**Отважный воит унял бандытов.** На вертаючого с Березжан воита Антонія Бочара, напа-

ло коло села Теофилевка 4-ох бандытов, домагаючи ся грошей. Бочар выстрілил до них трикратно, одного застрілил, а другого ранил. Двом здоровым ище бандытам казал положить ся на землі і при помочи людеі, котры надышли звязал их і отдал в руки полициї.

**Сельскы листоношы достанут светры, рукавичкы і наушникы.** В цілом краю кромі воеводств всходных ест затрудненых тепер парудесятерох тысячей сельскых листоношов. Штобы дати им возможность полнити их службу также в часі зимущных морозов, Мин. Почт і Телеграфов рішило закупити для них на кошт Державы теплы светры, рукавичкы і наушникы.

**78-еро дітей спалило ся в школі в Японії.** В провинции Вакаяма в Японії спалила ся 7-кл. школа народна. Ведля одержаных відомостей спалило ся в школі 78-еро дітей.

**Посвячене колейкы на гору Паркову в Крыниці.** В Крыниці уж от тыждня ест чудна санна і прекрасна погода. Прото тыж приїжджат там каждого дня много людеі. Великый наплыв гостей мал місце дня 19. т. м., бо в том дні отбыло ся посвячене горской линово-тереновой електричной колейкы, ведучой на гору Паркову. В торжестві приняли участь: гг. Маршалова Пилсудска, вицеминистер Бобковский, воевода д-р. Тыминский і много представителей ріжных организации.

**Дітина упала под ноги матери.** На передмістю Грудзьондза мал місце случай, котрый лем чудом не закончил ся смертю дітины.

Муж і жена Палковскы вышли до міста і оставили троє дітей без присмотра. По години 3-літна Кристинка видячи вертаючих родителей, выхлылила ся зацадто через выглед і вылетіла с II-го поверха просто под ноги перестрашеной матери. На счастье дітина упала на купу назгартаного снігу і зломіла собі лем ножку.

**Помер Людендорф.** В Монахом помер в 72 року житя генерал німецькый Людендорф, оден со знаных генералов світової войны. Людендорф был приятелем і сотрудником ген. Гинденбурга і разом с ним выготовлял пляны, котры Німеччині приносили славны побіды на всіх фронтах.

По законченю войны Людендорф посвятил ся публицыстычной діяльности, а также интересовал ся справами религийными.

**Волкы сожерли 10-літнього хлопчика.** На дорозі, ведучой через ліс-коло Бйшишок на Виленщині, люде переходячи нашли голову дітины, школярску шапку і течку.

Перестрашены тым видом, дали знати на полицию. Слідство дало ревеляційны результаты.

Попередного дня 10-літныи Антось Косолайць вышол с дому до школы, отдаленой о 2 км. Понеже не научил ся лекции, учитель оставил го в школі на науці. Выпустил го аж о год. 7-ой вечером. Хлопец вертал вечером через ліс. В лісі напал го кырдель волков і сожер.

Трагична смерть зробила пригнобляюще гражене в цілої околиці.

**Напад на школу.** На стрых школы в Угрыні закрал ся злодій. Управитель школы, слышачи подозрительный шум, вышол на стрых. Там узрїл злодія, котрый замахнул ся на него сожыром. В тотчас учитель цофнул ся і заалармовал полицию. В результате арестовано напастника, котрым оказал ся Теодор Пелячик.

**Посвячене школы в Тыличі пов. новосандецкого.** В Тыличі посвячено новопобудовану школу народну. В торжестві принял участь староста д-р. Лах, котрый, отдаючи будынок школьный до ужитку населеня, выголосил промову.

**Николаевский вечер в Мохначці Нижной.** Діти, ходячи до школы на дополнительные вечерны курсы приготовили под руководством місцевої учителькы Ст. Дуркот Николаевский вечер. На представлене пришло праві ціле населеня села так, же сая і корытар были переполнены. Доход с представления перезначено на зимущну помоч для бідных школьных дітей того села.

**Помоч Москы для Кытая.** С Шанхая і Токіо доносят, же Совіты дают чимраз сильнійшу помоч кытайскым войскам. Агенция Домен доносит, же амбасадор советский в Кытаю представил плян конкретной помочи, яку Москва даст Кытави, если: 1) правительство кытайске буде зреорганизовано так, штобы „фронт народный” антияпонский мал рішительну перевагу, і 2) если до штабу марш. Чанг-Кай-Шека войдут офицеры кытайской коммунистичной армии. Агенция тот доносит также, же до Ганкоу Совіты прислали 120 военных самолетов і 240 летчиков і механиков.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ

ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО.

НЕХАЙ ЯКНАЙСКОРШЕ

за асекурує ся

в асекураційном Товаристві

ВИТА И КРАКОВСКЕ

во ЛЬВОВІ



Асекурацію приймаюти на цілої Лемковщині  
представителі: гг. Осиф Яновицкий — Крыница - Село  
і Михаил Перелом — Сянок.